

La'o Hamutuk

Institutu Timor-Leste ba Monitor no Analiza Dezenvolvimentu

Rua Felicidade (Rua Cardoso Dias) Gricenfor, Bairro Central, Dili, Timor-Leste
P.O. Box 340, Dili, Timor-Leste Tel: +670-3321040 ka +670-77234330 (mobile)

email: laohamutuk@gmail.com Website: www.laohamutuk.org



Dili, 03 Marsu 2026

KOMUNIKADU IMPRENSA

Agresaun kriminál husi Estados Unidos Amerika no Izraél kontra Iraun:

Apelu De-eskalasaun, Respeitu ba Lei Internasionál no Preservasaun Estabilidade Global

La'o Hamutuk manifesta preokupasaun profunda kona-ba intensifikasaun konfliktu militár iha Médiu Oriente ne'ebé envolve Izraél, Estados Unidos no Iraun. Evolusaun ida ne'e, tuir informasaun publika disponivel no análise normativu tuir lei internasionál, hamosu agravamentu situasaun seguransa rejionál no global, no impaktu umanitáriu no ekonómiku ne'ebé sériu. EUA nian atake ba Iraun nudár krime, violasaun kontra lei internasionál, viola karta ONU no kontra rasik Konstituisaun EUA.

Konfliktu ida ne'e dala ida tan representa violasaun ba orden internasionál ne'ebé baseadu ba regra sira no ba integridade sistema seguransa kolektivu tuir Karta Nasoins Unidas. Lei internasionál tenke aplika ho koerénsia, imparcialidade no konsisténsia ba parte hotu, independentemente husi aliansa polítika ka interesse estratéjiku.

Timor-Leste, hanesan nasaun ne'ebé hetan benefísiu husi lei no solidariedade internasionál no sistema multilaterál iha ninian prosesu manán soberania no konstrui estadu, iha responsabilidade moral no istória atu defende orden internasionál ne'ebé baseadu ba lei, soberania iguál no rezolusaun pasífiku konfliktu sira.

Obrigatoriedade Lei Internasionál no Limitasaun Uza Forsa

Tuir Artigu 2(4) Karta Nasoins Unidas, estadu sira iha obrigasaun atu la uza ameasa ka uza forsa kontra integridade territorial ka independénsia polítika Estadu rai seluk. Prinsípiu ida ne'e mak pilar fundamental ba estabilidade no seguransa internasionál.

Artigu 51 Karta Nasoins Unidas rekoñese direitu naturál autodefeza individual ka kolektiva bainhira atake armadu akontese. Maibé, ezersísiu direitu ne'e tenke respeita estritamente prinsípiu nesesidade no proporsionalidade, no presiza iha fundamentasaun objetiva, prova sufisiente no transparénsia.

Artigu 8bis Estatutu Roma define krime **Agresaun** "the use of armed force by a State against the sovereignty, territorial integrity or political independence of another State, or in any other manner inconsistent with the Charter of the United Nations."

Interpretasaun ne'ebé ultrapasa limite jurídiku ne'ebé iha lei internasionál bele halo fraku sistema seguransa kolektivu no hamosu presedente perigozu ba lejítimasaun uza forsa unilateral.

Direitu Internasionál Umanitáriu no Protesaun Sivíl

Hanesan konsekuénsia atake ida ne'e, liu ema na'in 500 iha Iraun lakon ona sira nia moris, no ema balu iha Izraél, forsa militar EUA nian, no rai seluk iha rejiaun. Chega!

Parte hotu iha obrigasaun atu respeita Direitu Internasionál Umanitáriu, inklui:

- Distinsaun estrita entre alvu militar no populasau sivíl no objetu sivíl;
- Respeitu rigorozu ba prinsipiu proporsionalidade;
- Adosaun medida preventiva ne'ebé efetiva hodi hamenus risku ba populasau sivíl no infraestrutura esensial.

Protesaun sivíl sira nudár obrigasaun ba seguransa no dignidade umana tenke tau iha sentru konsiderasaun política no militar. Violaun norma sira ne'e bele hamosu irresponsabilidade internasionál no halo kredibilidade orden global.

Multilateralizmu no Responsabilidade Kolektiva

Sistema Nasoins Unidas iha papél sentráu atu previne agravamentu konfliktu no promove solusaun diplomátiku. Fortalesimentu diplomasia multilateral no respeitu ba Karta Nasoins Unidas mak fundamentu ba seguransa globál.

Enfrakezimentu sistema multilateral bele hamosu inseguransa jurídika internasionál no aumenta risku konfrontasaun sistémiku entre poténsia sira. Nasaun ki'ik hanesan Timor-Leste depende maka'as liu ba orden internasionál ne'ebé bazeadu ba regra no ba protesau soberania iguál.

La'o Hamutuk Rekomenda ba;

1. Parte hotu liu-liu EUA no Izraél atu imediatamente hapara operasaun militar no hamenus tensaun;
2. Atu retornu diálogo diplomátiku ho boa fé no mediadu husi mekanizmu multilateral;
3. Atu respeita integralmente Karta Nasoins Unidas, Estatutu Roma no Direitu Internasionál Umanitáriu;
4. Ba Governu Timor-Leste atu reafirma ninian pozisaun prinsipál pro-pás no pro-lei internasionál, no prepara medida preventiva hodi proteje populasau husi impaktu ekonómiku global.

Paz no seguransa global la bele konstrui liu husi intensifikasaun militar. Forsa la bele substitui lei. Orden internasionál ne'ebé bazeadu ba regra sira mak garantia fundamental ba estabilidade global no protesau ba nasaun ki'ik.

La'o Hamutuk reafirma katak diplomasia, diálogo no justisa mak fundamentu ba solusaun sustentavel no preservaun dignidade umana.